

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

- केन्द्री गृहमंत्री अमित शाह होरें आक्खेआ ऐ जे औंदे दऊं ब'रें च खब्बे घड़े दे अत्तवाद दा खात्मा करी दित्ता जाग।
- उपराज्यपाल मनोज सिन्हा होरें आक्खेआ जे कुपवाड़ा तौले गै रेल संपर्क राएं सिद्दे मुल्खै दे बाकी हिस्सें कन्नै जुड़ी जाग।
- वायु सेना जम्मू दे एयर कोमोडोर सागर सिंह रावत होरें आक्खेआ ऐ जे भारतीय ब्हाई फौज बन्ने पारां कुसै बी चुनौती जां खतरे कन्नै असरदार ढंगै सिर निब्बड़ने लेई पूरी चाल्ली तैआर ऐ।
- एशियाई खेड्डें च भारत गी हासल तगमें दी गिनतरी अज्ज बडलै 100 पर पुज्जी। प्रधानमंत्री नरेन्द्र मोदी होरें एह आंकड़ा पार करने लेई खडारिएं गी ममारकबाद दित्ती।

<><><><><><>

Home Minister

गृहमंत्री अमित शाह होरें आक्खेआ ऐ जे अगले दऊं ब'रें च मुल्खै थमां अत्तवाद पूरी चाल्ली खत्म होई जाग। कल नमीं दिल्ली च अत्तवाद उप्पर इक जायजा बैठका दी अध्यक्षता करदे होई श्री शाह होरें आक्खेआ जे प्रधानमंत्री नरेन्द्र मोदी हुंदी अगुवाई च ते अत्तवाद प्रभावत सब्बनें राज्यें दे सैहयोग कन्नै 2022 ते 2023 च एहदे खलाफ बड्डी सफलता हासल होई ऐ। अमित शाह होरें आक्खेआ जे सरकार दी जीरो-टालरेंस नीति दे नतीजे ताई पिच्छले 4 दहाकें च 2022 च हिंसा ते मरोने आलें दी गिनतरी घट्ट सतह उप्पर दर्ज कीती गई। उनें आक्खेआ जे अगले दऊं ब'रें च अत्तवाद गी खत्म करने दा इस ब'रे घेइया पक्का कीता ऐ।

<><><><><><>

LG

उपराज्यपाल मनोज सिन्हा होरें आक्खेआ ऐ जे बन्ने आले जिले कुपवाड़ा गी देशै दे रेल नक्शे पर आहन्नेआ जाग की जे रेल मंत्रालय नै उत्थें रेलवे लाइन दे सर्वेक्षण दी मजूरी देई दित्ती ऐ।

सिन्हा होरें आखेआ ऐ जे रेल मंत्रालय नै कुपवाड़ा लेई रेल लाइन दे तकनीकी सर्वेक्षण गी मंजूरी दित्ती ऐ ते तपसीली प्रोजेक्ट रिपोर्ट जमा होने दे बाद इस रेलवे लाइन पर कम्म शुरू होई जाग। कल कुपवाड़ा च पत्रकारें कन्नै गल्ल करदे होई सिन्हा होरें आखेआ जे कुपवाड़ा तौले गै रेल नेटवर्क कन्नै जुड़ी जाग। मगरा सिन्हा होरें बारामुला जिले दे विकास दी तांग आले अकांक्षी ब्लाक सिंघपुरा च संकल्प सप्ताह दे दरान हाड़ी फसलें सरबंधी अभियान दा उद्घाटन कीता। उनें हाड़ी फसलें दी रड़ गी बढ़ावा देने लेई उंदे प्रशासन पाससेआ कीते गेदे जतनें पर लोह पाई ते आखेआ जे कश्मीर खित्ते दे लोक पीली क्रांति दे गवाह बने करदे न ते 1 लक्ख 40 ज्हार हैक्टर रकबे पर सरेयां दी रड़ कीती गोई ऐ।

<><><><><><>

Secretary Tourism

सैलसफा सचिव डॉ. सैय्यद आबिद रशीद शाह होरें घराना वैटलैंड ते सुचेतगढ़ बन्ने दा दौरा लाया ते इनें सैलानी थाहरें उप्पर चला'रदे विकास कम्मं दा जायजा लैता। उनें बक्ख-बक्ख विकास परियोजनाएं दा जायजा लैता जिस च चलने लेई पक्के रस्ते, जम्मू च घराना वैटलैंड ते सुचेतगढ़ इलाके गी बड़डे बन्ने आले सैलसफा दे तौरा पर बदलना ते होरने शामिल ऐ। डॉ. शाह होरें सक्रिय जन-भागीदारी, खास करियै नौजवानें दी सैलसफा आलिये असरदार थाहरें दे विकास च लाने उप्पर जोर भरेआ। खित्ते गी मन-मोहना बनाने आस्तै उच्चा भारतीय झंडा ते ओकटरोई च तलाह बनाने दे बी निर्देश दित्ते।

<><><><><><>

Div.Com-Basohli

जम्मू दे डिवीजनल कमीशनर रमेश कुमार होरें बसोहली दा दौरा लाया ते सरबंधत विभागें ते सिविल समाज दे मिंबरें कन्नै औंदे नराता महोत्सव दी मेजबानी दी तैआरिये दी चर्चा दी इक बैठका दी अध्यक्षता कीती। एह महोत्सव 15 अक्टूबर थमां 23 अक्टूबर तोड़ी लगगोग। नराता महोत्सव दी क्षमता जिस च मकामी अर्थ-बवस्था गी अग्गे बधोग, दे बारे गल्ल करदे होई डिवीजनल कमीशनर होरें माने भरोचे दे अतीत ते बसोहली खित्ते दे इतिहास उप्पर लोह पांदे होई गल्ल कीती। उनें आखेआ जे इस महोत्सव दा मकसद डोगरा संस्कृति ते मूल तत्व, बसोहली चित्रकारी, बसोहली पशमीना, हथखड्डी ते बसोहली दी विश्व सतह उप्पर थहोई दी 12में संस्करण गी राम लीला पेश करने गी मनाना ऐ। डिवीजनल कमीशनर होरें आखेआ जे इस बड़डे कार्यक्रम राएं खित्ते दी सगोसार बिरसे गी दर्शाने दा मकसद ऐ। इस मौके सिविल, पुलस ते सैलसफा विभाग थमां अफसर उत्थें मजूद हे।

<><><><><><>

Mushroom Kishtwar

इक बड्डी खोज च किशतवाड़ सरकारी डिग्री कालेज च बाटनी विभाग दे हैड प्रोफेसर फैसल मुश्ताक किचलू होरें बिरली ते अनूठी खुंब प्रजाती दी खोज कीती ऐ जेहड़ी जे भारत च अजें तोड़ी दी पैहली नेह खोज ऐ। इस दे बारे न्यूजीलैंड थमां साईंसदानें बी इसदी पुष्टी कीती ऐ ते इस बारे इक मन्नी परमन्नी दी अंतराष्ट्रीय अनुसंधान जर्नल च बी छापेआ ऐ। एह खोज किशतवाड़ जिले दे दूर दरेड़े इलाकें च होई ऐ।

<><><><><><>

DC-Jammu

जम्मू दे डिप्टी कमीशनर सचिन कुमार वैश्य ते एडीशनल डिप्टी कमीशनर हरविंदर सिंह होरें कल अखनूर ब्लाक दी गड़खाल पंचैत दा दौरा लाइयै इस ग्रां गी आदर्श ग्रां च तब्दील करने सरबंधी जतनें दा जायजा लैता। इस मौके पर मकामी लोकें अपने किश मसले उंदे अगगे रक्खे जिंदे च हाड़ थमां बचाह आले हीलें, खेड्ड मैदान विकसित करने, शिड़कें दी मरम्मत कीते जाने ते सरकारी हाई स्कूल गड़खाल दा दर्जा बघाए जने दियां मंगां शामिल हियां। एहदे इलावा बन्ने कन्नै लगदी जमीनें दे मसलें पर बी चर्चा कीती गई। डिप्टी कमीशनर होरें मुतल्लका एहलकारें गी हुक्म रसाल कीता जे ओह बक्ख-बक्ख कम्में ते प्रोजेक्टें लेई तैह कीती गेदी समें-सीमा दी पालमा जकीनी बनान। उनें आक्खेआ जे सब्बनें शा जरूरी मसलें गी पैहल दी बिनाह उप्पर नबेड़ेआ जाना लोड़चदा ऐ।

<><><><><><>

Bhaderwah

भद्रवाह दे ब्लाक मुख्यालय च मेरी माटी मेरा देश कार्यक्रम लोआया गेआ। सब्बनें सरपंचें अपनी-अपनी पंचायतें थमां मिट्टी गी आहन्नियै भद्रवाह ब्लाक मुख्यालय पजाया। इस मौके नगनी सांस्कृतिक ग्रुप आस्सेआ इक सांस्कृति कार्यक्रम पेश कीता गेआ। डोडा दे डीडीसी अध्यक्ष धनंतर सिंह कोतवाल ते उंदे नै द्रराडू ते थाना लैंड सारना दे सरपंचें बी मेरी माटी मेरा देश अभियान उप्पर अपने बचार सांझे कीते। प्रतिभागिएं आस्सेआ पंच-प्रण दी सगंध बी चुक्की गई। सब्बनें पंचायतें थमां मिट्टी गी किट्टा करियै इक कलश च रक्खेआ गेआ।

<><><><><><>

Peace Prize

ईरान दी मनुक्खी अधिकारें सरबंधी कारकून नरगिस मोहम्मदी होरें गी महिलाएं दे खलाफ होने आले अपराधें गी लेइयै बुआज चुक्कने ते कम्मं कारवाइएं लेई 2023 ब'रे दा नोबेल शांति पुरस्कार दित्ता जाग। इस पुरस्कार कन्नै सम्मानत होने आली ओह् 19मीं महिला होंगन।

<><><><><><>

IAF

जम्मू कश्मीर च वायु सेना दे एयर कोमोडोर सागर सिंह रावत होरें आक्खेआ ऐ जे भारतीय ब्हाई फौज कुसै बी आपदा चा चुनौती कन्नै निबडने लेई पूरी चाल्ली तैआ ऐ। उनें गलाया जे जम्मू प्रांतै च पाकिस्तान दी तरफा भेजे जाने आले ड्रोन दे खतरे कन्नै निबडने लेई हर मुमकन उपाह कीते गे'न। एह गल्ल उनें कल 8 अक्तूबर गी मनाए जाने आले वायु सेना दे 91में स्थापना दिवस कोला पैहले जम्मू च जंदे रोज लोआए गेदे इक कार्यक्रम दरान मीडिया कन्नै गल्ल करदे होई आक्खी। उनें आक्खेआ जे ब्हाई फौज दे ज्यादातर निगरानी अभियान कामयाब रेह न ते अस जम्मू कश्मीर च निगरानी ते चौकसी बनाई रखने च पूरी चाल्ली सक्षम आं। एयर कोमोडोर रावत होरें आक्खेआ जे वायु सेना इनें अभियानें गी थल सेना दे सैहयोग कन्नै पूरी कामयाबी कन्नै तोड चाढ़दी ऐ।

<><><><><><>

Asian games

चीन दे हांगझोऊ च होआ करदिएं एशियाई खेड्डें च भारत नै कुल 100 तगमें जित्ती लैते न। अज्ज खीरी ध्याड़े महिलाएं दे कबड्डी ते तीरअंदाजी च भारत नै सुन्ने दा तगमा जित्तेआ ऐ। प्रधानमंत्री नरेन्द्र मोदी होरें इस उपलब्धि गी महत्त्वै आला करार दित्ता ऐ। इक ट्वीट च मोदी होरें आक्खेआ जे भारत दे लोक इस गल्ला गी लेइयै खुश होई गेदे न जे भारत नै 100 तगमे जित्तने आला संगेमील हासल करी लैता ऐ।

<><><><><><>

Cricket

आईसीसी क्रिकेट विश्व कप च हैदराबाद च खेड्डे गेदे मकाबले च कल पाकिस्तान नै नीदरलैंड गी 81एं रंजें कन्नै हराई दित्ता ऐ। अज्ज बंगलादेश दा मकाबला अफगानिस्तान कन्नै ते दक्खनी अफ्रीका दा मकाबला श्रीलंका कन्नै होग।

<><><><><><>

Ved Mandir

जम्मू दे अमफला आले वेद मंदर च चर्तुवेद पुराण पर त्रळुं दिनें च वैदिक सम्मेलन शुरू होआ, जेह्दे च मुख्य भरै थमां वैदिक गुरु हिस्सा लै करदे न। नमीं दिल्ली दी सेंद्रल संस्कृत यूनिवर्सिटी दे वाईस चांसलर प्रो. निवास होर कार्यक्रम दे मुख्य परौहन ते दिनेश कामत होर मुख्य वक्ता हे। जम्मू च एह् अपनी किस्मै दी पैहली कांफ्रेंस ऐ ते एह्दा आयोजन केन्द्र सरकार पाससेआ कीता जा करदा ऐ। ज्योतिशाचार्य डॉ. शिव प्रशाद रैणा होरें लोकें गी आग्रेह कीता ऐ जे ओह् वेद विद्या सिक्खन। इस बारे आकाशवाणी समाचार जम्मू कन्नै गल्ल करदे होई वेद मंदर कमेटी जम्मू दे आयोजन होरें आखेआ

<><><><><><>

DHSJ

ऐल्लै जारी आयूष्माण भवः अभियान तैहत सेहत सेवा निदेशालय आस्सेआ इक स्वयंसेवी रक्तदान शिवर दा आयोजन कीता गोआ। जम्मू दे स्वास्थ्य सेवाएं सरबंधी निदेशक डॉ. राजीव कुमार शर्मा होरें इस शिवर दा उद्घाटन कीता ते रक्तदान बी कीता। उनें आक्खेआ जे खून दी हर बूंद कीमती ऐ ते एह् कुस दा जीवन बचाई सकदी ऐ। इस मौके निदेशालय दे अफसरें, होरने कर्मचारिएं ते जम्मू सीएमओ दफतर दे अमले नै बी शिवर च रक्तदान कीता। कैप च आभा शनाख्ती कार्ड बनाने लेई सेवा बी प्रदान कीती गई।

<><><><><><>

Udhampur

उधमपुर दिएं डिप्टी कमीशनर सलोनी राय होरें संगठित बाल विकास योजना आईसीडीएस, शिक्षा ते सेहत मैहकमें आस्सेआ लागू कीती जा'रदी बक्ख योजनाएं, कार्यक्रमें ते पैहलकदमिं दा जायजा लैता। इस मौके पर जिला प्रोग्राम अफसर पोषण होरें बक्ख-बक्ख योजनाएं ते गतिविधिं बारे जानकारी दित्ती। डिप्टी कमीशनर होरें उनेंगी हुक्म दित्ता जे ओह आंगनवाड़ी केन्द्रें च बच्चें गी दित्ती जाने आली खुराक पर नेड़मी तक्क रक्खन।

<><><><><><>